

NJOFTIM PËR KONSULTIM PUBLIK

PROJEKTLIGJI “PËR POLICINË E SHTETIT”

Ministria e Brendshme fton qytetarë, organizata të shoqërisë civile, ekspertë të fushës, shoqata dhe përfaqësues të tjerë të publikut të interesuar për të kontribuar përgjatë procesit të konsultimit publik të projektligjit “Për Policinë e Shtetit”.

Ministria e Brendshme mirëpret:

Komente të përgjithshme publike mbi përcaktimet e projektaktit, kryesisht mbi:

- Rregullimi i veprimtarisë policore;
- Policimin demokratik të orientuar tek shërbimi ndaj qytetarëve, rritjes dhe përmirësimit të cilësisë së shërbimeve.

Kontributet tuaja do të konsiderohen përgjatë procesit të përmirësimit të mëtejshëm të projektligjit.

Ministria e Brendshme do të përmbledhë të gjitha sugjerimet dhe komentet tuaja dhe do të japë sqarime për mënyrën se si ato janë reflektuar në projektakt, edhe në rast se mendimet nuk reflektohen.

Kohëzgjatja e konsultimeve:

Konsultimi publik do të zgjasë 20 ditë, nga data 13 mars 2024 deri më 2 prill 2024.

Si të përgjigjeni:

Mund të merrni pjesë në procesin e konsultimeve publike duke dërguar komente/kontribute për projektin:

- Duke plotësuar formularin online të Regjistrin Elektronik për projektligjit, në adresën elektronike: <http://www.konsultimipublik.gov.al>;
- Me email duke dërguar propozimet/sugjerimet tuaja në adresën e koordinatorit të konsultimit publik për Ministrinë e Brendshme, Sara Shameti, në adresën: Sara.Shameti@mb.gov.al

Kontakti:

Të dhënat e kontaktit të koordinatorit përkatës për konsultime publike dhe/ose të ndonjë personi tjetër të cilit i drejtohen pyetjet:

Datat dhe vendet e takimeve publike:

- Ky projektligj është pjesë e korpusit të akteve ligjore e nënligjore të propozuara në kuadër të masave për zbatimin e programit të Qeverisë 2021-2025 dhe prioritetëve në fushën e rendit dhe të sigurisë publike të parashikuara në Kreun “Shqipëria e Sigurtë” të këtij programi. Miratimi i këtij projektligji është parashikuar në programin analitik të akteve të miratuara me vendim të Këshillit të Ministrave nr. 790, datë 28.12.2023 “Për miratimin e programit të përgjithshëm analitik të projektakteve që do të paraqiten për shqyrtim në Këshillin e Ministrave gjatë vitit 2024”.
- Në dhjetor të 2022, Policia e Shtetit filloi incimin e ndryshimeve ligjore në ligjin nr. 108/2014, “Për Policinë e Shtetit”, të ndryshuar.
- Në bazë të Urdhrit Nr. 62, datë 28.04.2023 të Ministrit të Brendshëm, “Për ngritjen e grupit për hartimin e projektligjit “Për disa ndryshime dhe shtesa në ligjin nr. 108/2014 “Për Policinë e Shtetit”, të ndryshuar”, grupi i punës i përbërë nga anëtar të Policisë së Shtetit dhe nëpunës të Ministrisë së Brendshme, ka punuar mbi hartimin e draftligjit.
- Në takimet e grupit të punës kanë marrë pjesë edhe organizata partnere ndërkombëtare, ku projektligji ka konsideruar dhe reflektuar gjerësisht rekomandimet e vlerësimeve të organizmave dhe ekspertizës ndërkombëtare/evropiane/rajonale si rekomandimet e progres raportit të Komisionit Evropian, GRECO-s, OSCE, por edhe modeleve dhe standardeve të policimit, transparencës dhe integritetit, efikasitetit të menaxhimit dhe drejtimit policor, operacionalitetit, modernizimit dhe aspekte të tjera të shprehura në rekomandimet e ICITAP, EU4LEA, CIDS.

Sfondi i propozimit legjislativ

Hartimi i projektligjit është bazuar në një analizë të kuadrit të mëparshëm ligjor për Policinë e Shtetit, në një vlerësim dhe analizë të thelluar të modeleve të ligjeve për policinë të vendeve të Bashkimit Evropian si Itali, Rumania, Kroaci, Slloveni dhe vendeve të rajonit nga të cilat janë reflektuar dhe përshtatur shumë elementë që lidhen me strukturën e ligjit, modelet e strukturave dhe organeve vendimmarrëse, modelet e organizimit strukturor, kompetencat dhe kriteret e emërimit, lirit, shkarkimit të autoriteteve, modele të sistemeve të motivimit, pranimi, ecuri në karrierë, kompetencave policore, standarde dhe parime të ushtrimit të kompetencave dhe shumë aspekte të tjera, për të hartuar një projektligj më bashkëkohor dhe të qëndrueshëm në raport me këto standarde, modele dhe parime.

Projektligji do të shërbejë gjithashtu për krijimin e infrastrukturës së domosdoshme ligjore për Policinë e Shtetit me synimin për t’ju përshtatur proceseve reformuese dhe integruese në fushën e rendit dhe sigurisë publike, sfidave aktuale në lidhje me kriminalitetin.

Akti synon përmbushjen e rekomandimeve kryesore të organizmave të BE-së dhe atyre ndërkombëtare, si dhe të vendeve partnerë për krijimin e kapaciteteve apo strukturave të munguara në Policinë e Shtetit.

Gjithashtu synohet përmirësimi i organizimit, menaxhimit, funksionimit të veprimtarisë së strukturave policore, proceseve e procedurave, zhvillimit profesional të punonjësit të policisë, ecurisë në karrierë etj., duke i përafruar me parimet e standardet e vendeve të BE, përmbushjen në mënyrë efektive të misionit të Policisë së Shtetit dhe rritjen e efikasitetit në përmbushjen e detyrave e përgjegjësiwe institucionale.

Propozimet

Ky projektligj do të krijojë bazën e nevojshme për një rol dhe angazhim më proaktiv të policisë në identifikimin dhe adresimin rrënjësor të shkaqeve të krimit.

Me qëllim, rritjen e besimit të qytetarëve, organizatave dhe partnerëve vendase dhe të huaja ndaj policisë projektligji krijon mekanizmat e përshtatshëm për rritjen e transparencës dhe informimit të publikut në mënyrë të institucionalizuar dhe dinamike mbi veprimtarinë e policisë.

Përcaktimet ligjore mundësojnë thellimin e bashkëpunimit të policisë me agjencitë dhe palët e tjera të interesit dhe fuqizimin e komunitetit, rritjen e reagueshmërisë, komunikimit dhe ndërveprimit të tij me policinë për të identifikuar kërcënimet e reja, për të parandaluar dhe ndihmuar në zbulimin e çdo shkelje të ligjit dhe për t'u përfshirë në proceset vendimmarrëse për përmirësimin e shërbimit policor.

Në pikëpamjen e organizimit strukturor, me qëllim, rritjen e efikasitetit në menaxhimin e kapaciteteve të policisë është parashikuar një infrastrukturë e përshtatshme organizative, e profilizuar, më e thjeshtë dhe më funksionale.

Projektligji do të sjellë përmirësimin e procesit të llogaridhënies, forcimin e rolit të mekanizmave të jashtëm të mbikëqyrjes, monitorimit dhe vlerësimit të performancës së policisë.

Pyetjet

Jeni të ftuar të jepni komentet dhe kontributet tuaja për të gjitha aspektet e projektligjit të propozuar. Për më tepër, ne kemi zgjedhur pyetjet e mëposhtme ku kontributi juaj do të jetë veçanërisht i vlefshëm, dhe të cilave mund t'i përgjigjeni duke plotësuar një pyetësor të shkurtër në internet.

- Si mendoni se mund të ndikojë ky ligj i ri në disiplinimin e autoritetit policor brenda limiteve të ligjit dhe të drejtave e lirive të njeriut?
- Në projektligj janë përcaktuar mekanizma për garantimin e transparencës në emërime apo vendimmarrjen me ndikim në aspekte kyçe të veprimtarisë së Policisë së Shtetit. Mendoni se kjo do të shërbejë në mënyrë efikase?